



Sesida dals

Communitgà ils

Protocol nr.

14 da schaner 2020

16 da schaner 2020

25

Dumonda Gasser

concernent il futur da fusiuns da vischnancas

Resposta da la Regenza

La Regenza renviescha a sias remartgas introductivas sin la dumonda da la fracziun da la PPS concernent futuras fusiuns da vischnancas sco er a sias ultimas explicaziuns en il rom da la dumonda Maissen concernent il futur da fusiuns da vischnancas e da vischnancas fusiunadas (PCG dal zercladur 2019, p. 937 ss.) e da l'ura da dumondas durant la sessiun d'avust 2019 (PCG da l'avust 2019, p. 132 s.).

Tar la dumonda 1: Il process da fusiun en il Grischun ha ina basa democratica e suonda reglas dal stadi da dretg. Mintga vischnanca decida en moda autonoma e tenor ils principis ch'èn fixads en sia constituziun, sch'ella vul fusiunar u betg. Il princip da "bottom up" è sa cumprovà en il Grischun. L'introducziun d'ina maioritad qualifitgada per votaziuns davart fusiuns da vischnancas stess en cuntradicziun diametrala cun ils svilups structurals positivs dals ultims onns. Las finamiras ch'il Cussegl grond aveva fixà per el sez, na fissan betg realísticas. Numerusas fusiuns da vischnancas, en spezial er talas d'entiras valladas, na fissan betg vegnidas realisadas cun la pretensiun d'ina maioritad qualifitgada. L'art. 64 da la Constituziun chantunala (CC; DG 110.100) prescriba ch'il chantun promova la fusiun da vischnancas. Ina disposiziun chantunala che prescriba ina maioritad qualifitgada per tut las votaziuns davart fusiuns da vischnancas u per cas singuls ubain tenor la quala las vischnancas dastgassan introducir in tal quorum, na correspundess betg a la constituziun. Er autras decisiuns elementaras ed impurtantas per il stadi (p.ex. revisiun da la CC) vegnan prendidas tras maioritad simpla.

Tar la dumonda 2: Las contribuziuns chantunalas da promoziun vegnan pajadas per regla senza in intent specific. Sch'il chantun deliberass contribuziuns liadas ad in intent per ils secturs numnads en la dumonda 2, stuessan quellas bain vegnir concedidas a tut las vischnancas che fusiuneschan. I dastgass esser fitg difficil da fixar

ils criteris respectivs, damai ch'i n'è betg pussaivel da definir las finamiras ed er betg da controllar, sche quellas èn vegnidas cuntanschidas. Ultra da quai duess la fusiun da vischnancas simplifitgar las structuras e betg installar a medem temp structuras parallelas. Perquai è la Regenza da l'avis ch'i n'è betg cunvegnet da colliar contribuziuns da promoziun cun las cundiziuns pretendidas.

Tar la dumonda 3: La participaziun politica sco dal rest er quella ad occurrenz socialas u culturalas è en general sa midada marcantamain ils ultims onns. Quai dastgass bain vegnir attribuì en emprima lingia al svilup social. In sguard en duas radunanzas communalas che han gì lieu dacurt a Haldenstein mussa, che la participaziun a la votaziun era mintgamai sut 10 pertschient – quai gist en fatschentas ch'èn centralas per l'ulteriur svilup dal vitg tenor il comité Pro Haldenstein. Ils 16 da matg 2019 è per exempel vegnì tractandà il credit per ina concorrenza davart l'engondiment da las localitads da scola, ils 10 d'october 2019 la revisiun parziala da la planisaziun locala. Votaziuns a l'urna, sco quai ch'ellas èn usitadas en vischnancas pli grondas, vegnan per regla da mobilisar dapli votantas e votants. Ils differents systems politics garanteschon mintgamai en lur atgna moda e maniera il dretg da cundecisiun directdemocratic.

Il chantun n'ha nagina influenza directa sin l'engaschament politic en las vischnancas. El promova dentant las stentas correspudentas. Ultimamain ha el sustegnì l'elavuraziun d'in mussavia resp. dal tool online per vischnancas per promover la generaziun giuvna politica (www.promo35.ch). Il project da la Scola auta spezializada dal Grischun ha chattà in grond resun en las medias da la Svizra.

Il contract da fusiun prevesa la pussaivladad per tut las abitantas ed ils abitants da Haldenstein che han il dretg d'eleger, da sa participar quest onn a las elecziuns per la citad (fusiunada) da Cuira. I fess senz'auter imaginabel e giavischabel, sche numerusas personas participassan activamain a la responsabladad generala politica.



En num da la Regenza

Il president:

Il chancelier:

Dr. Chr. Rathgeb

Daniel Spadin